



ORANG ramai memilih ikan segar untuk dibeli hasil tangkapan nelayan di Pantai Telaga Papan, Setiu, Terengganu, semalam. - UTUSAN/PUQTRA HAIRRY ROSLI

Satu tan ikan, sotong laris dalam sejam

UM 27/05/23 MIS 32

Oleh **KAMALIZA KAMARUDDIN**
utusannews@mediamulia.com.my

SETIU: Hampir satu tan hasil laut ikan dan sotong yang baru ditangkap nelayan di Pantai Telaga Papan di sini laris dalam tempoh sejam pagi semalam apabila dijual dengan harga yang murah.

Tinjauan *Utusan Malaysia* mendapati orang ramai mula berkumpul di pantai tersebut seawal pukul 7.30 pagi kerana mahu mendapatkan bekalan ikan yang segar secara terus daripada nelayan tempatan.

Seorang pengunjung, Mohd. Ehsan Rahmat, 39, berkata, penduduk Setiu sentiasa menanti kepulangan nelayan ke pantai pada hari-hari tertentu di fasa 'bulan gelap' kerana hasil tangkapan banyak dan harganya lebih murah berbanding di pasar basah biasa.

"Suasana di sini memang meriah bagaikan pesta kerana pengunjung akan membeli pelbagai jenis hasil laut tanpa kehadiran orang tengah mengaut keuntungan.

"Alhamdulillah, ini rezeki kami dapat membeli ikan yang segar, murah dan boleh menjadikannya stok simpanan untuk dimakan pada bila-bila masa," katanya ketika ditemui di sini, semalam.

Antara ikan yang dijual nelayan ialah ikan selar pada harga RM18 untuk satu kilogram (kg), lolong (RM10), cencaru (RM22) tongkol (RM8) dan sotong (RM10 hingga RM30 bergantung pada saiz).

Seorang kakitangan swasta, Nur Amirah Aisyah Husin, 32, pula berkata, dia datang ke pantai itu kerana mahu membeli ikan dalam jumlah yang banyak untuk menyambut kepulangan adik-be-

radiknya dari Kuala Lumpur, Selangor dan Johor hari ini.

"Kebetulan musim cuti sekolah sudah bermula, jadi emak pesan suruh beli banyak sikit nak bagi anak-anak yang duduk jauh makan ikan segar dari laut.

"Rumah kami memang ada peti 'freezer' yang agak besar untuk menyimpan stok ikan segar yang dibeli dari nelayan tempatan kerana selain segar, kita juga boleh tawar menawar harga kerana sudah lama kenal antara satu sama lain," katanya.

Sementara itu, nelayan, Jamaludin Mohamad, 56, berkata, dia bersama 40 awak-awak dengan menaiki dua bot akan menangkap ikan di sekitar kawasan Zon C1 dan Zon B1 kerana hasil tangkapan akan lebih lumayan pada fasa bulan gelap.